

每週經課朗誦經文(巴克禮台語漢字)2013/09/01

共同經課 - 1 耶利米書二章四節~十三節

4 雅各的家啊，以色列家的逐房頭啊，恁著聽耶和華的話。5 耶和華按呢講：恁的列祖看我有甚麼不義，竟然離開我遠遠，去趁許個虛假者，來做虛假者啊？6 in 亦無講：彼個導咱出埃及地的耶和華佇叨落？伊是導咱經過曠野，沙漠及深坑的所在，亢旱、死蔭的地、無人經過，無人倚起的境界。7 我導恁入肥的地，互恁食彼中間的果子及好物；總是恁入來了就拍拉墜我的地，互我的產業成做可惡的。8 祭司攏無講，耶和華佇叨落咧？講解律法的毋識我。官長悖謬我；先知靠巴力來識語，閣趁無利益的事。9 耶和華講：我因為按呢欲及恁爭辯，亦欲及恁的子子孫孫爭辯。10 恁著過去基提諸個海嶼來觀看，差人去基達留心查考，看曾有此號事抑無。11 豈有一國改換 in 的上帝嗎？其實許個毋是上帝！總是我的百姓將 in 的榮光來換彼個無利益的。12 諸個天啊，著因為此個來印愕，極其驚惶，盡在冷靜！這是耶和華講的。13 因為我的百姓做二項歹代，就是我做活水的源頭，in 離開我，閣為家己開池，是破裂袂貯水的池。

共同經課 - 2 詩篇八十一篇一節，十節~十六節

1 〔亞薩的詩，交互樂官。用迦特的調。〕上帝——是阮的氣力，恁著大聲謳啉伊，著出歡喜的聲謳啉雅各的上帝！10 我是耶和華——你的上帝，曾導你對埃及地上來；著大開你的嘴，我就充滿伊。11 總是，我的百姓毋聽我的聲；以色列全然毋俵睬我。12 我就出在 in 照 in 的心的固執，互 in 照 in 家己的計謀去行。13 願我的百姓肯聽我，以色列肯行我的路，14 我就緊緊制壓 in 的仇讎，越轉我的手攻擊 in 的對敵。15 怨恨耶和華的人欲來投降伊，總是 in 的時代欲久長佇啲。16 伊亦欲用好的麥互 in 食，我用對石磬出的蜜互 in 食飽。

共同經課 - 3 希伯來書十三章一節~八節，十五節~十六節

1 兄弟的相疼著久長。2 莫得袂記得接待人客；因為對按呢曾有接待著天使，亦毋知的。3 著數念諸個受關者，親像及 in 相同關；數念受暴虐者，是恁亦有身軀。4 婚姻，人人著尊重，床無拉墜；因為私通行淫的人，上帝欲審判伊。5 心志毋通貪財，掠所有的做夠額；因為上帝有講：「我決斷無放揀你，決斷無離開你。」6 所以咱通好膽講：主就是幫助我的，我無欲驚惶；人欲啥法得我奈何？7 前引導恁、用上帝的道理傳互恁的人，恁著數念 in，看 in 行做的結局，來學 in 的信。8 耶穌基督昨日、今仔日同一樣，直到代代。15 所以著對耶穌，常常用謳啉做祭獻互上帝，這就是承認主名的嘴唇所結的果子。16 獨獨行好及相供給，恁毋通袂記得，因為此號的祭是上帝所歡喜的。

共同經課 - 4 路加福音十四章一節，七節~十四節

1 安息日，耶穌入一個法利賽頭人的厝欲食，in 啲當等伊。7 耶穌看許個人客揀大位，就設譬喻對 in 講：8 「恁互人請去赴婚姻的筵桌，莫得坐大位，驚了比你卡尊貴的也互伊請；9 就請你及請伊的來給你講：『讓位互此人！』你就見請退去坐佇尾位。10 獨獨互人請的時，著去坐尾位，就請你的來給你講：『朋友啊，坐起來。』彼時，你佇同桌的人的面前就有體面。11 因為，見若自高的，欲互伊卑微；家己卑微的，欲高升伊。」12 耶穌也給請伊的人講：「你辦日晝頓抑是下昏頓，毋通請你的朋友，抑是兄弟，抑是親戚，抑是好額的厝邊，驚了 in 倒請你，你就受報答。13 若是你辦筵桌的時，著請喪鄉的、破相的、跛腳的、睛暝的，你就有福氣！14 因為 in 無通報答你。就佇義人復活的時，你欲得著報答。」